

ROM (The Epistle of Paul to the Romans)

Cathut e kamthang lawk kahawi

¹ Kai Pawl, Jisuh Khrih e a san, Cathut ni a kamthang kahawi pâpho hanlah, na rawi teh na kaw e, guncei lah kaawm e ni ca na patawn awh.

² Hote kamthang kahawi teh Cathut ni ahmaloe hoi profetnaw koe na kam pouh tangcoun e hoi, Cakathoung daw k a thut tangcoun lah kaawm e,

³ Cathut Capa Jisuh Khrih e kong hah doeh. Tami koe lahoi teh Devit catoun lah ao.

⁴ ThOUNGNAE Muitha bahu lahoi duenae koehoi boutthawnae, Cathut capa lah a onae, heh a kamnue sak.

⁵ Hote Bawipa min lahoi Jentelnaw pueng ni yuemnae hoi Cathut lawkngainae koe pha sak nahanelah, guncei lah coun gnae coe awh.

⁶ Nangmouh hai hote Jentel mip hun lah na o awh teh, Jisuh Khrih hoi na kâkuet awh nahanelah, kaw e lah na o awh.

⁷ Hottelah Cathut ni a pahren teh tami kathoung lah a kaw e Rom kho kaawm e naw pueng koe, hete ca heh ka thut. Maimae Pa Cathut hoi, Bawipa Jisuh Khrih koehoi lungmanae hoi lungmawngnae teh nangmouh koe awh lawiseh.

Rom kho Pawl cei han a ngai

⁸ Nangmae yuemnae teh talaivan pueng a kamthang dawkvah, nangmouh hanelah kaie Cathut koe Jisuh Khrih lahoi hmaloe ka lung-hawi.

⁹ Ouk ka ratoum navah nangmouh pou na pouk awh teh, Cathut ngainae awm pawiteh, hnin hnin touh hnin teh bangte lahoi ne nangmouh koe ka pha thai nahane lam a aw nahan ouk ka ratoum.

¹⁰ Capa e kamthang kahawi ka pâpho teh, ka muiitha lahoi ka bawk e Cathut hah kai kapanuekkhaikung lah ao.

¹¹ Bangkongmaw nangmouh kâhmo hanlah ka ngai tetpawiteh, nangmouh hah muiitha poehno buetbuet touh rei teh, na cak awh nahanelah thapoe hanelah ka ngai poung dawk doeh.

¹² Hottelah ka ti navah kaie yuemnae ni nangmouh tha na poe teh, nangmae yuemnae ni kai tha na poe teh, yuemnae lahoi buet touh hoi buet touh lungkâpatawnae coe awh nahane doeh.

¹³ Hmaunawngghanaw, Jentelnaw koe ka cei navah hawinae ka hmu e patetlah nangmouh koe hai hmu hanlah, tho hane atuhoitu ka kâcai ei, na katarawkkung ao dawk atu sittouh ka tho thai hoeh.

¹⁴ Kai teh Griknaw, tamipathunaw, a lungkaangnaw, hoi miphun pueng koe laiba ka tawn e lah ka o.

¹⁵ Hatdawkvah, Rom kho kaawm e nangmouh koe a coung thai totouh kamthang kahawi pâpho hanlah coungkacoe lah ka o.

Kamthang kahawi e bahu

¹⁶ Kai teh Khrih e kamthang kahawi kecu dawk kayanae ka tawn hoehe. Bangkongtetpawiteh, hote kamthang kahawi teh ahmaloe vah Judahnaw, hahoi Griknaw koe pâpho lah o teh, ka yuem e tami pueng ka rungngangnae Cathut e bahu doeh.

¹⁷ Cakathoung ni vah, tamikalan teh yuemnae lahoi a hring han ati e patetlah, yuemnae dawkhoei e Cathut lannae teh akung hoi a hmo ditouh hete kamthang kahawi dawka kamnue.

Talai taminaw e yon

¹⁸ Lawkkatang ka ngang e taminaw, Cathut laipalah khosaknae naw hoi kamsoumhoehe khosaknae naw pueng dawkalvan hoi Cathut lungkhueknae teh a pha.

¹⁹ Bangkongtetpawiteh, panue kawie Cathut e a kong naw teh ahnimanaw koe a kamnue toe. Cathut ni ahnimouh koe a pâpho toe.

²⁰ Bangtelah hoi maw a pâpho tetpawiteh, talaivan pek a kamtawng hoi Cathut e hmuthaihoehe a yungyoe bawilenna, a Cathutnae teh, a sak e hnonaw dawkhoei kamcengcalah panue thai kawilah ao dawkvah, ahnimouh ni kâtang thai mahoehe.

²¹ Bangkongtetpawiteh, ahnimouh ni Cathut hah a panue awh nahlangva vah, Cathut pholen hane totouh pholen a hoehe. A lungmanae hai noutna a hoehe. Ayawmyinlah pouknae hoi lungthin pathunae koe a pha awh.

²² Ahnimouh teh amamouh hoi amamouh a lungkaang e patetlah a kâsak awh nahlangva vah, ka pathu e lah ao awh.

²³ Kamko thai hoeh e Cathut e a bawilennae hah a pahnawt awh teh, kamko thai e, tami, tava naw, a khok pali touh e moithangnaw, vonpui hoi kâva e moithangnaw hoi kâvan e meikaphawknaw hah Cathut e yueng lah a ta awh.

²⁴ Hatdawkvah, ahnimanaw teh buet touh hoi buet touh a kâbari awh hoeh nahan, amamae lungngai e patetlah khinnae kut dawk Cathut ni a poe awh.

²⁵ Ahnimouh ni lawkkatang Cathut yueng lah a kaphawk e cathut hah a tâ awh teh, kasakkung Cathut a pahnawt awh. A sak e hno hah a bawk awh. Hote Bawipa teh a yungyoe yawhawinae awmseh. Amen.

Taminaw khosak kamkonae

²⁶ Hottelah a sak awh dawkvah, ahnimanaw teh kayanae kut dawk Cathut ni a poe toe. Bangtelamaw tetpawiteh, napuinaw ni, tongpa hoi onae heh a pahnawt awh teh, napui reira ao awh.

²⁷ Hot patetvanlah, tongpanaw ni hai napui hoi onae phung a pahnawt awh teh, buet touh hoi buet touh cuknae hmai patetlah a kak awh teh, kayatho poug e tongpa reira a hmawng awh teh, amamae a yon awh e patetlah lawkcengnae teh a kâhmo awh.

²⁸ Hothloilah ahnimouh ni Cathut panue han a ngai awh hoeh dawkvah, hno kahawihoe a sak awh nahanelah, Cathut ni hounlounnae kut dawk ahnimouh teh a poe toe.

²⁹ Ahnimanaw teh hno kahawihoe saknae a phunphun, kamsoumhoehe napui tongpa yonnae, mawikainae, hounlounnae, hounroenae,

³⁰ Utsinnae, tami theinae, kayanae, dumyennae, tami hmunghaihoehnae, mathengpaanae, kâoupkâpawinae, thoum kawi hoeh e thoumnae, manu na pa lawkngaihoehnae, kâhruetcuethoehnae,

³¹ thaipanuekhoehnae, lawkkamcakhoeahnae, lungkâpatawhoeahnae, ngaithoum thaihoehnae, pahrenhoehnae lungthin ka tawn e tami lah ao awh.

³² Hottelah kaawm e tami teh a due hane roeroe lah ao telah Cathut ni ati e heh a panue awh nahlangva, amamouh ni a sak dueng laipalah hottelah ka sak e taminaw koehai a lungkuep awh.

2

Cathut lannae

¹ Ayânaw lawk ouk ka ceng e tami nang, na yon na ramuk thai mahoeah. Bangkoktetpaw-iteh ayânaw lawk na ceng e patetlah nama ni roungrong na sak dawkvah, ayânaw lawk na ceng nah ka yon tie kamceng saknae lah ao.

² Cathut ni hottelah kaawm e taminaw hah lawk a ceng tie teh lawkkatang hoi a kânging tie maimouh ni panue awh.

³ Hot patet e yon, ma ni sak nahlangva vah ayâ ni a sak e teh, akung ka kheh e tami, Cathut e lawkcengnae dawkhoi ka hlout han telah na pouk maw.

⁴ Cathut lungmanae ni pankângainae lamthung dawkh na hrawi e heh panuek laipalah, a lungmanae, a lungsawnae, panguepnae naw heh banglahai na noutna awh hoeh bo vaw.

⁵ Hatei na lungpatanae hoi pankângaihoehnae dawkvah, a lungphuenna hnin lah kaawm e Cathut e a lannae hoi lawkcengnae hnin navah ma ni khang han e, a lungkhueknae teh na pâtung awh toe.

⁶ Cathut ni tami pueng teh amamae a tawk awh e patetlah aphu a poe han.

⁷ Hnokahawi sak hanelah a lung katang niteh, bawilenna hoi barinae hoi kamko thai hoeh e hnonaw ka tawng e teh a yungyoe hringnae a poe han.

⁸ Ma hane dueng pouk teh, lawkkatang tarawi laipalah, lanhoehnae dawk kho ka sak e taminaw koevah, puenghoi a lungkhueknae hoi a lungphuenna teh a pha sak han.

⁹ Runae hoi pataw khangnae naw teh, ahmaloe vah, Judahnaw koe, hahoi Griknaw, kathoute hno kasaknaw pueng koe, kalenpounge runae teh a pha han.

¹⁰ A bawilenna hoi barinae hoi lungmawngnae teh ahmaloe vah Judahnaw, hahoi Griknaw, hawinae ka sak e taminaw pueng koe a pha han.

¹¹ Bangkongtetpawiteh Cathut teh apie minhmai hai khen hoeh.

¹² Kâlawk panuek laipalah ka yon e naw teh kâlawk laipalah rawknae koe a pha awh han. Kâlawk panue nahlangva, ka yon e naw teh kâlawk e lawkcengnae hah a khang han.

¹³ Bangkongtetpawiteh, a lawk ka thai e ni Cathut hmalah lannae coe hoeh. A lawk ka tarawi e ni doeh Cathut hmalah lannae teh a coe.

¹⁴ Jentelnaw ni teh kâlawk panuek laipalah amamae a tawksaknae heh a kâuepkhai awh.

¹⁵ Ma hoi ma kâpanuenae ni a kampangkhai teh, buet touh hoi buet touh a kâpan awh teh, yon a kângaithoum awh teh, amamae lungthin thung kaawm e thoehawi kamcengcalah a kam-nue sak awh.

¹⁶ Kai ni ka dei e kamthang kahawi patetlah Cathut ni Jisuh Khrih lahoi yah, taminaw e arulahoï a tawksak e naw hah lawkcengnae hnin toteh hottelah lawk a ceng han.

Judahnaw hoi kâlawk

¹⁷ Nang teh namahoima Judah tami lah na kâpouk teh, kâlawk na kâuep teh, Cathut na kâuepkhai teh,

¹⁸ Cathut ngainae ka panuek e tami, kâlawknaw na tarawi teh, kapekkaboe thai e tami lah na o teh,

¹⁹ mitdawnnaw lam ka pâtue e tami, kahmawt um kaawm naw ka ang sak e tami,

²⁰ tamikaponaw ouk ka yue e tami, camonaw ka cangkhai e tami, kâlawk lahoi lungangnae hoi lawkkatang ka panuek e tami lah ka o titeh mahoima na ka pouk e lah na awm pawiteh,

²¹ ayânaw na yue nahlangva vah, namahoima na ka cangkhai thai hoeh maw. Ayânaw e hno parawt hanh telah na dei nahlangva vah na paru bo vaw.

²² Uicuk hanh na ti nahlangva, nama na uicuk bo vaw. Meikaphawk na panuet nahlangva bawkim na raphoe bo vaw.

²³ Kâlawk na kâoupkhai nahlangva vah, hote kâlawk hah na tapoe teh, Cathut na bari hoeh bo vaw.

²⁴ Bangkongtetpawiteh Cakathoung dawk a thut e patetlah Jentelnaw ni nange na nuencang hah a khet awh teh Cathut min a pathoe awh.

²⁵ Nang teh kâlawk na tarawi pawiteh vuensoma e lahoi ahawinae ao. Hatei kâlawk na ek pawiteh nange vuensoma e teh a hoeh e patetlah bout ao.

²⁶ Hothloilah vuensoma hoeh e tami teh, kâlawk heh tarawi pawiteh, ahnie vuensoma hoeh e heh vuensomanae lah ouk pouk pouh nahoehmaw .

²⁷ Hatnavah takthai dawk vuensom ka a hoeh nakunghai kâlawk tarawi pawiteh, kâlawk lahoi vuensomanae ao nahlangva, kâlawk na ek pawiteh, lawkceng lah na o han.

²⁸ Bangkongtetpawiteh, alawilah hoi Judah tami lah kaawm e tami teh, Judah tami katang nahoe. Alawilah hoiyah tak dawk vuensoma e teh vuensoma katang e nahoe.

²⁹ Thung lahoi Judah tami katang lah kaawm e doeh Judah tami katang. Vuensomanae hai Ca Karuem lahoi laipalah Muitha lahoi lungthin koelae vuensomanae doeh vuensoma e katang lah kaawm. Hot patetlah vuensom ka a e teh tami oupnae laipalah, Cathut ni oup e lah ao.

3

Cathut e lawkkam caknae

¹ Hat pawiteh, Judah tami ni bangmaw meknae kaawm. Vuensomanae ni bangmaw hawinae kaawm.

² Ahawinae aphunphun ao. Hmaloe vah, vuensoma lah kaawm e Judahnaw teh Cathut lawk hah a coe awh.

³ Hat pawiteh, ahnimouh thungvah ka yuem hoeh e awm pawiteh bangtelane ahnimae yuemhoehtae ni Cathut yuemkamcunae hah a kâ raphoe sak han na maw.

⁴ Kâ raphoe mahoeht. Cathut ni a lawk lahoi lannae lah a coe teh, lawkceng toteh tâ nahanelah, Cakathoung dawkt thut e patetlah tami pueng teh laithoe kadeikung lah ao awh ei, Cathut teh kalan e lah awm naseh, telah ati.

⁵ Hatnavah, maimae lanhoehtae ni Cathut lannae kamnuek sak pawiteh, bangtelamaw dei awh han. Tami koe lahoi dei pawiteh, lungkhuehtae ka phat sak e Cathut teh kalan hoeh e Bawipa lah maw ao.

⁶ Hottelah khoeroe awm hoeh. Hottelah awm pawiteh Cathut ni bangtelah hoi maw talaivan lawk a ceng han vaw.

⁷ Hatei, kaie laithoenae lahoi Cathut lawkkatang ni a bawilennae hoe pung sak pawiteh, kai heh tamikayon buet touh lah bangkongmaw lawkceng e lah ka o rah vaw.

⁸ Hnokahawi a tâco nahanlah hno kahawihoeht sak awh han, telah tet thai mahoeht maw. Tami tangawn ni hottelah maimouh ni dei awh ati awh teh, maimouh dudam lahoi a dei awh. Ahnimae yonphukhangnae teh a kamcu doeh.

Tami kalan buet touh boehai awmhoeh

⁹ Hottelah pawiteh, bangtelah han maw. Maimouh teh hoe hawi awh maw. Hoe hawi awh hoeh. Bangkongtetpawiteh, Judahnaw hoi

Griknaw hai yon rahim vah ao tie yo kamnue sak toe.

¹⁰ Cakathoung dawk thut e patetlah tamikalan awmhoeh, buet touh boehai awmhoeh.

¹¹ Ka thai panuek e awmhoeh. Cathut ka tawng e awmhoeh.

¹² Tami pueng lam a phen awh teh, abuemlahoi cungkeihoeh lah ao awh toe. Hnokahawi ka sak e apihai awmhoeh, buet touh boehai awmhoeh.

¹³ Ahnimae a lawkron teh kamawng e tangkom lah ao. Ahnimouh ni a lai hoi laithoe a dei awh. A pahni dawk hrunthoe sue ao.

¹⁴ Ahnimae apâhni teh lawkthoeumkha hoi akawi.

¹⁵ Ahnimae khok teh tami thei hane koe lah a hue a rang awh.

¹⁶ Ahnimae lamthung dawk kamkonae hoi roedengnae ao teh,

¹⁷ Ahnimouh ni rounnae lam panuek awh hoeh .

¹⁸ Ahnimae mit dawk Cathut takinae tawn awh hoeh.

¹⁹ Kâlawk ni a dei e pueng teh kâlawk thung kaawmnaw hanelah doeh tie panue awh. Hot-telah ao dawkvah, talaivan pueng teh lawk kam touh boehai dei thai laipalah, Cathut hmalah ka yon e lah ao awh.

²⁰ Hatdawkvah, kâlawk tarawinae lahoi apihai Cathut hmalah tamikalan lah awm thai hoeh. Bangkongtetpawiteh, kâlawk teh yon ka panuek-sakkung lah doeh ao.

²¹ Atuteh kâlawk hoi profet lawknaw ni a kam-pangkhai e Cathut lannae teh, kâlawk laipalah a kamnue toe.

²² Cathut lannae teh Jisuh Khrih kayuemnaw pueng e lathueng vah a pha. Hatdawkvah, kapeknae khoeroe awmhoeh.

²³ Bangkongtetpawiteh, tami pueng teh a yon awh dawkvah Cathut bawilennae hoi kâhla awh toe.

²⁴ Ahnimouh teh Cathut lungmanae dawk Khrih Jisuh thung ratangnae lahoi apu poe laipalah na lan toe telah khoe e lah o toe.

²⁵ Cathut ni ama lannae a kamnue sak nahanelah Khrih hah a rawi teh, yuemnae hanlah Khrih thipaling teh thuengnae lah ao sak. Phunloun lahoi dei pawiteh, Cathut ni a lungsawnae lahoi kaloum tangcung e yonnae naw hah pâkuem laipalah ao.

²⁶ Hatdawkvah, atuteh amae lannae hah kamnue sak hane hoi Cathut ama roeroe alan teh, Jisuh ka yuem e taminaw hai alansak.

²⁷ Hat pawiteh, kâoupkhai kawi na mouh ao va. Hot teh pahnawt lah ao toe. Bang phung hoi mouh pahnawt lah ao va. Tawksaknae hoi maw. Na hoe. Yuemnae lahoi pahnawt lah ao.

²⁸ Bangkongtetpawiteh, tami teh kâlawk tarawinae lahoi laipalah yuemnae lahoi tamikalan lah na khoe toe tie lah pouk awh.

²⁹ Nahoe pawiteh, Cathut teh Judahnaw hane Cathut dueng na maw. Jentelnaw e Cathut lahai awmhoeh namaw. A o. Jentelnaw e Cathut lahai ao.

³⁰ Yuemnae lahoi vuensom ka a e tami teh na lan toe telah khoe e lah ao teh, vuensom ka a hoe naw hai yuemnae lahoi na lan toe telah ka khoe e Cathut teh buet touh duengdoeh.

³¹ Hat pawiteh, maimouh ni yuemnae lahoi

kâlawk teh pahnawt awh namaw. Khoeroe pahnawt awh hoeh. Kâlawk hah hoe caksak awh.

4

Abraham e yuemnae

¹ Hottelah pawiteh maimae na pa Abraham teh takthai lahoi bang mouh ahawinae a coe vaw.

² Abraham teh a tawksaknae hoi lannae koe phat pawiteh kâoupkhai kawi lah ao. Cathut hmalah teh hottelah nahoe.

³ Cakathoung dawk a dei navah Abraham teh Cathut a yuem dawkvah ahnie yuemnae teh lannae lah a khoe pouh.

⁴ Thaw tawknae lahoi kutphu hmu e teh lungmanae nahoe, a hmu hanelah a kamcu dawk a hmu e doeh.

⁵ Thaw tawknae awmhoeh eiteh, tamikayon-naw hanlah na lan toe telah katetkung Bawipa hah, ka yuem e tami teh ahnie yuemnae hah lannae lah khoe pouh lah ao.

⁶ Hot patetlah Cathut ni a thaw tawknae khen pouh laipalah a poe e lannae kacoekung e a yawhawinae hah Devit ni a dei navah,

⁷ yon ngaithoum lah kaawm e, yonnae naw ramuk pouh lah kaawm naw teh a yawhawi awh.

⁸ Cathut ni yonpennae dawk hoi ka hlout e tami teh a yawhawi telah ati.

⁹ Vuensoma lah kaawm naw dueng maw hote yawhawi ka coe han vaw. Ka a hoeh naw hai a coe han maw. Abraham e yuemnae teh ahnie lannae lah a khoe pouh, ati.

¹⁰ Hot hah, bangpatinah maw a khoe pouh. Vuensoma nah maw. Hoehpawiteh, vuensoma hoehnahlan maw. Vuensoma hnukkhu laipalah, vuensoma hoehnahlan vah hottelah khoe e lah ao toe.

¹¹ Hot patetvanlah, Abraham teh vuensoma hoehnahlan yuemnae dawkh hoi tamikalan telah khoenae hah vuensomanae lahoi a kamnue sak. Het hateh Abraham hah, vuensoma laipalah ka yuem e tami pueng e na pa lah ao nahane hoi ahnimanaw hai lannae a coe awh nahane doeh.

¹² Hahoi, Abraham teh kayuemnaw pueng e na pa lah ao hane hoi vuensoma dawkh dueng laipalah, a hoehnahlan hoi kaawm e yuemnae dawkh ka cet naw e na pa lahai ao nahane doeh.

Yuemnae lahoi coe e lawkkam

¹³ Hete talaivan heh râw lah na pang sak han telah Abraham koe poe e lawkkam teh, kâlawk khetsin lahoi poe e tho laipalah, yuemnae lahoi coe e lannae dawkh hoi doeh poe e lah ao.

¹⁴ Bangkongtetpawiteh, kâlawk hoi kâkuen e naw ni râw coe awh pawiteh, yuemnae teh ayawmyin lah awm vaiteh, lawkkam hai karawkh han doeh.

¹⁵ Kâlawk ni teh lungkhueknae a tâcokhai. Hatei kâlawk awm hoeh pawiteh, payonnae hai awmhoeh.

¹⁶ Hatdawkvah lawkkam teh yuemnae hoi doeh a kâkuet. Hote lawkkam teh lungmanaeh lahoi a coung sak teh, kâlawk hoi kâkuen e miphunnaw hane dueng laipalah, Abraham e yuemnae hoi kâkuen e catoun lah kaawm e

catounnaw pueng hanelah a caksak nahane doeh.

¹⁷ Kai ni nang teh moikapap e miphunnaw e na pa lah na coung sak toe telah Cakathoung dawkhut e patetlah Abraham teh ama ni a yuem e Cathut, kadout e naw hah kahring sak niteh, kaawm hoeh e hnonaw hah ao thai nahanelah ka ka poe thai e Cathut hmalah, maimouh pueng e na pa lah ao.

¹⁸ Ahni teh ngaihawi hanlah kaawm hoeh toung e hah a ngaihawi, a yuem teh, na catoun teh hettelah ao han telah lawkkam pouh e patetlah moikapap e miphunnaw e na pa lah ao.

¹⁹ Ahni teh a kum cum touh bang a pha nah, amae a tak teh kadout e patetlah ao e hoi, Sarah e von a due toe tie hai a panue eiteh yuemnae dawkhut a thayounnae awmhoeh.

Yuemnae lahoi coe e lannae

²⁰ Cathut e lawkkam dawkhut lunghringnae tawn laipalah yuemnae a len poung teh Cathut a pholen.

²¹ Cathut teh lawkkam a poe e patetlah a sak thai tie hai khoeroe a yuem.

²² Hatdawkvah, yuemnae hah ahnie lannae lah khoe pouh e lah ao.

²³ Hatei, ahni hah khoe e lah ao telah Cakathoung dawkhut a thut e teh, Abraham buet touh hane dueng nahoeh. Maimouh hanelah hai thut e lah ao.

²⁴ Maimae Bawipa Jisuh hah duenae koehoi kathawsakkung hah ka yuem e maimouh hai na lan toe telah na khoe awh han.

²⁵ Bawipa Jisuh teh maimae payonnae dawkvah, thei e lah ao teh maimouh lansaknae coe nahanelah a thaw toe.

5

Roumnae lahoi lunghawinae

¹ Hatdawkvah maimouh teh yuemnae lahoi lannae koe phat pawiteh maimouh Bawipa Jisuh Khrih lahoi Cathut hmalah roumnae coe awh toe.

² Hote lungmanae coe thainae teh, yuemnae tawn awh teh, hote Bawipa dawkhoei dueng doeh coe thainae kâ tawn awh. Hatdawkvah Cathut e Bawilennae ngaihawi lahoi konawmnae tawn awh toe.

³ Hot dueng nahoe, rucatnae khang nahaiyah lunghawinae tawn awh toe. Bangkongtetpawiteh, rucatnae ni teh panguepnae a thokhai.

⁴ Panguepnae ni teh panuecainae a thokhai. Panuecainae ni teh ngaihawinae a thokhai.

⁵ Hote ngaihawinae ni maimouh yeirai na poe mahoe. Bangkongtetpawiteh, Cathut e lungpatawnae ni maimouh na poe e Kathoung Muitha lahoi maimae lungthung vah awi e lah o awh toe.

⁶ Maimouh thayoun lah o awh lahun navah, Khrih teh atueng a pha nah cathutlaipa e taminaw hanlah a due.

⁷ Bangkongtetpawiteh, tamikalan hanelah kadout hane tami a takang. Hawinae ka sak e tami hanelah teh ao thai tet ei sei.

⁸ Maimouh teh tamikayon lah o awh lahun nah, Khrih teh maimae yon kecu dawkhoei a due toe. Cathut ni maimouh banghloine lungpataw awh tie kacaicalah a kamnue sak.

⁹ Hatdawkvah atuteh a thipaling lahoi lan-nae koe pha hnukkhu, hote Bawipa lahoi a lungkhueknae dawk hoi hlout awh han tie hoe ngaihawinae ao.

¹⁰ Bangkongtetpawiteh, taran lah o awh lahun nah Ama e Capa duenae lahoi, maimanaw teh Cathut hoi bout kâmaihawi awh toe. Kâmaihawi tangcounng lah kaawm e maimouh teh, Capa e hringnae lahoi rungngangnae dawk pha han doeh telah ngaihawinae hoe ao.

¹¹ Hot dueng laipalah, atu maimouh bout kâmaihawinae na kapoekung Bawipa Jisuh Khrih lahoi Cathut dawk konawmnae tawn awh.

Adam hoi Khrih

¹² Hatdawkvah, yon teh tami buet touh lahoi talaivan dawk a kâen teh, yon ni duenae a thokhai e patetlah tami pueng a yon awh tOUNg dawkvah, duenae koe a pha awh.

¹³ Kâlawk poe hoehnahlan hoi talaivan dawk yon teh ao toe. Hatei, kâlawk awmhoeh pawiteh yon hah yon telah khoe thai hoeh.

¹⁴ Hateiteh, Adam koehoi kamtawng teh Mosi totouh duenae ni a uk. Adam ni a yon e patetlah kayonhoehe naw pueng hai kOUNg a uk. Hote Adam teh ka tho hane a tâhlip lah ao.

¹⁵ Hatei, aphulaipa poehno hoi yonnae kâvan hoeh. Bangkongtetpawiteh, tami buet touh a yon kecu dawk tami moikapap dout pawiteh, Cathut lungmanae hoi tami buet touh Jisuh Khrih lungmanae dawk hoi poehno teh, tami moikapap koevah lungmanae hoehoe apap han.

¹⁶ Hothloilah, tami buet touh payonnae ni a thokhai e hoi poehno teh kâvan hoeh.

Bangkongtetpawiteh, buet touh koelah lawkcengnae dawkh teh, yonphukhangnae lah ao. Hatei, yonnae moikapap dawkh hoi aphulaipa poehno ni teh lansaknae a tâcokhai.

¹⁷ Bangkongtetpawiteh, tami buet touh ni a yon tounge dawkvah, hote tami buet touh e pawlawk dawkh duenae ni na uk pawiteh, ka kuep e lungmanae hoi lannae poehno ka coe e naw ni tami buet touh tie Jisuh Khrih pawlawk dawkh hoi hringnae ni hoehoe a uk awh han.

¹⁸ Hatdawkvah tami buet touh e payon kecu dawkvah taminaw pueng yonphukhangnae lawkcengnae koe a pha e patetlah, tami buet touh e lannae pawlawk lahoi tami pueng hringnae hoi lansaknae koe lah phanae kâ tawn awh toe.

¹⁹ Bangkongtetpawiteh, tami buet touh e lawk eknae kecu dawkh tami moikapap yon dawkh pha e patetlah tami buet touh lawkngainae lahoi tami moikapap lannae koe pha awh.

²⁰ Kâlawk teh yonnae pung sak hanelah doeh a kâen. Hatei, yonnae a pungnae koe lungmanae hoe a pung.

²¹ Hottelah pawiteh yon ni duenae lahoi na uk e patetlah lungmanae haiyah lannae lahoi na uk teh maimae Bawipa Jisuh Khrih lahoi a yungyoe hringnae coe thai nahane doeh.

6

Hring katha dawkhoktakannae

¹ Hottelah pawiteh bangtelamaw dei awh han. Lungmanae a pung nahanelah yonnae hoehoe sak awh han na maw.

² Sak a mahoe. Yonnae dawk kadout e naw teh hote yonnae dawk bangtelah vai bout a hring toung vaw.

³ Khrih Jisuh thung baptisma ka coe e maimouh teh a duenae thung baptisma coe awh tie na panuek awh hoe h maw.

⁴ Hottelah maimouh teh a duenae dawk baptisma coe e lahoi, ama hoi cungtalah pakawp e lah o awh. Khrih ni Na pa e bahu lahoi duenae koehoi a thaw e patetlah maimouh hai hring kathanae daw hring awh hane doeh.

⁵ A duenae koe ama hoi rei dout awh pawiteh, a thawnae koe vah ama hoi rei thaw a van han.

⁶ Maimae tami karuem teh Khrih hoi cungtalah thingpalam daw k thei lah ao toe. Hottelah nangmae tami karuem takthai raphoenae teh yonnae san lah bout o awh hoe h na hanlah tie panue awh.

⁷ Ka dout tangcoung naw teh yon daw k hoi a hlout toe.

⁸ Maimouh ni Khrih hoi cungtalah dout pawiteh ama hoi cungtalah hring han telah yuem awh.

⁹ Duenae koehoi ka thaw e Khrih teh bout dout mahoe h tie panue awh. Duenae ni Bawipa teh nâtuék hai uk thai mahoe h toe.

¹⁰ Khrih teh yonnae dawkvah vai touh lahoi kakhoutlah a due toe. Atu e hringnae teh Cathut daw k doeh a hring toe.

¹¹ Hot patetlah nangmouh hai yon daw k teh kadout e lah na o awh teh, Cathut daw k teh Khrih Jisuh lahoi kahring telah namahoima kâpouk awh.

¹² Hatdawkvah nangmae kadout thai e takthai ngainae tarawi hanelah yon koe kâ uk sak awh hanh.

¹³ Nangmae na tak puengcangnaw teh lan-hoehnae lah yonnae koe poe awh hanh lawih. Hothlak teh duenae koehoi bout kahring e patetlah, nangmae tak puengcangnaw teh lannae lah coung sak awh nateh Cathut koe namamouh hoi namamouh kâpoe awh.

¹⁴ Bangkongtetpawiteh, nangmouh teh kâlawk rahim na awm awh toung laipalah, lungmanae rahim na o awh toung dawkvah, yon ni nangmouh lathueng kâ bout tawn mahoe toe.

Yon san hoi lannae san

¹⁵ Hat pawiteh, bangtelamaw. Maimouh teh kâlawk rahim awm toung laipalah, Cathut lungmanae rahim o awh toung dawkvah, yon bout sak awh han rah maw. Khoeroe sak mahoe.

¹⁶ Nangmouh ni yah bawi e lawk ka ngai han telah na dei pawiteh nangmouh teh lawk na ngai pouh e bawi e a san lah na o awh. Hot patetvanlah yonnae a hnuk na kâbang pawiteh yonnae san lah na o vaiteh, lannae koe na ka phat sak e lawk na ngai pawiteh lannae san lah na o awh tie na panuek awh hoe maw.

¹⁷ Nangmouh teh yon san lah na o awh ei nakunghai, atuvah na coe awh tangcoung e cangkhae hah na ngai awh dawkvah, Cathut lungmanae a len tanggak.

¹⁸ Yonae daw k hoi na hlout awh teh, lannae san lah na o awh toung dawkvah, Cathut lungmanae teh ka pholen.

¹⁹ Hottelah ka ti navah, na tha a youn dawkvah hottelah ka dei e doeh. Ahmaloe teh namamae takthai puengcangnaw hah kahawihoehe hnosaknae dawkvah san lah na la hno awh e patetlah, atuteh namamae takthai puengcangnaw hah thoungnae hno sak nahanelah, lannae san lah poe awh nateh, thoungnae koe phat awh.

²⁰ Nangmouh teh yon san lah na o awh navah lannae dawk hoi na hlout awh.

²¹ Hatnavah atu na tawksaknae kayanae dawk hoi bangmaw hawinae na hmu awh vaw. Hot naw e a poutnae teh duenae doeh.

²² Hatei, atuteh yonnae dawk hoi na hlout awh toung dawkvah, Cathut e san lah na o awh teh thoungnae apaw hah na coe awh. Apoutnae koehai a yungyoe hringnae na pang awh han.

²³ Yon phu teh duenae doeh. Cathut ni na poe e poehno teh maimae Bawipa Khrih Jisuh thung yungyoe hringnae doeh.

7

Kâlawk dawk hoi hloutnae

¹ Hmaunawngghanaw, kâlawk kapanueknaw hanelah ka dei e teh, kâlawk ni teh tami a hring nathung dueng doeh a uk thai tie na panuek awh hoe h maw.

² Bangnuenae lah, vâ ka sak e napui buet touh teh a vâ a hring nathung dueng doeh vâsaknae ni a katek. A vâ dout pawiteh vâ hoi kâkuen e kâlawk dawk hoi a hlout.

³ Hatdawkvah a vâ a hring nahlangva, alouke tongpa hoi ipawm pawiteh ka uicuk e napui telah ti han. Hatei a vâ a due hnukkhu teh, kâlawk ni

kateknae thung hoi a hlout toe. A vâ bout sak pawiteh ka uicuk e napui tet mahoe h toe.

⁴ Hot patetvanlah, hmaunawnghanaw, nang-mouh hai, Khrih e a tak dawkvah kâlawk teh na due takhai awh toe. Het hateh alouke tami tie duenae koehoi ka thaw e Bawipa hoi kâkuen e lah o awh toung dawkvah, Cathut hanelah a paw paw nahane doeh.

⁵ Tami kahring takthai ngainae hoi hring awh navah, kâlawk ni a tâcokhai e yon sak ngainae ni maimae tak thungvah thaw a taw k teh duenae a tâco sak.

⁶ Atuteh maimouh na katek e kâlawk koe lah due awh teh kâlawk daw k hoi hlout awh toung dawkvah, kâlawk lahoi laipalah, Muitha e phung lam katha daw k thaw taw k e lah o awh toe.

Kâlawk hoi yonnae

⁷ Pawiteh bangtelamaw dei han. Kâlawk teh daw k a yon maw. Awm hoe h. Hateiteh kâlawk ni yon na panuek sak hoe h pawiteh yon tie panuek mahoe h. Kâlawk ni hno noe hanh tet hoe pawiteh hno noenae lungthin tie panuek mahoe h.

⁸ Hatei, yon ni kâpoelaw k hno lahoi hno noenae a cawngca a tâco sak. Kâlawk awmhoe h pawiteh yon teh kadout e lah ao.

⁹ Kai hai yampa teh kâlawk laipalah kho ka sak e lah ka o. Hatei kâpoelaw k a tho toteh, yon teh bout a hring, kai teh ka due.

¹⁰ Hringnae koe ka phat sak hane kâpoelaw k ni teh duenae koe na phakhai tie ka hmu.

¹¹ Yon ni kâlawk hno lahoi kai hah na dum teh hote kâpoelaw k ni kai teh na thei.

¹² Hatdawkvah kâlawk teh a thoung, kâpoelawk hai a thoung, a lan teh ahawi.

¹³ Hat pawiteh hettelah kahawi e hno heh kai hanlah duenae lah maw ao vaw. nahoe h bo. Kai hanlah duenae lah kaawm e teh yon hah doeh. Yon teh yon tie kamceng nahanlah hete kahawi e kâpoelawk lahoi kai koe duenae lah a coung sak. Hatdawkvah yon teh kâlawk lahoi touklek hoeh e yonnae naw lah a tâco.

¹⁴ Kâlawk teh muitha koelae hno doeh tie teh panue awh. Hatei kai teh takthai lahoi kaawm e lah ka o dawkvah yon san lah ka o.

¹⁵ Bangkongtetpawiteh kama ni ka sak e hno hah kama ni ka thaipanuek hoeh. Bangkongtetpawiteh ka sak ngai e sak laipalah, ka sak ngai hoeh e hah ouk ka sak.

¹⁶ Hottelah ka sak ngai hoeh e hah ka sak navah kâlawk e ahawinae teh ka hnâbo tinae doeh.

¹⁷ Hatdawkvah hete hno kasakkung teh kai nahoe h toe, ka thung kaawm e yon ni doeh a sak toe.

¹⁸ Ka thungvah tami coungnae daw k hawinae buet touh boehai awmhoeh tie teh ka panue. Bangkongtetpawiteh ka thungvah hawinae sak ngaina e ao eite h sak thaina e ka tawn hoeh.

¹⁹ Sak han ka ngai e kahawi hno sak laipalah sak han ka ngai hoeh e hno doeh let ka sak.

²⁰ Hottelah kai ni ka sak ngaihoeh e ka sak navah, kasakkung teh kai nahoe h, ka thung e kaawm e yon ni doeh a sak.

²¹ Hattote h kahawi hno sak han ka ngai e kahawihoe h hno ka thung vah ao tie hah ka hmu.

²² Kai teh ka thung e muitha tami ni Cathut e kâlawk dawk a lunghawi ei,

²³ ka takthai puengcang dawk alouke phung ao teh, ka thung e phung hoi a kâtaran dawkvah, ka takthai puengcang dawk kaawm e yon phung lahoi kai hah na man teh na katek tie hah ka hmu.

²⁴ Kai teh lungrei ka thai e lah doeh ka o. Hete duenae koehoi apinimaw na hlout sak han vai.

²⁵ Hatei maimae Bawipa Jisuh Khrih dawkhui hoi na kahloutsakkung Cathut teh ka pholen. Hettelah hoi kai teh ka lung thung hoi Cathut e phung dawk san lah ka o ei, takthai lahoi teh yon phung dawk san lah ka o.

8

Kathoung Muitha hoi hringnae

¹ Hatdawkvah atuteh Khrih Jisuh thung kaawm e naw pueng, yonphukhangnae awm mahoe toe.

² Bangkongtetpawiteh Khrih Jisuh thung kaawm e hringnae Muitha phung ni yon duenae phung thung hoi kai teh hlout sak lah ka o toe.

³ Cathut ni amae Capa hah yon kakawi e takthai lah yon kecu dawkhui a patoun teh, takthai dawkhui yon hah lawk a ceng teh, takthai lahoi kâlawk ni a sak thai hoe e hah na sak pouh toe.

⁴ Het hateh takthai ngainae laipalah, Muitha ngainae patetlah ka hring e maimouh koe kâlawk phung pathang e a kuep nahane doeh.

⁵ Takthai coungnae hoi hring han ka ngai e taminaw teh takthai coungnae naw hah a

ngailem awh. Muitha ngainae patetlah ka hring e taminaw teh Muitha hoi kâkuen e naw hah a ngailem awh.

⁶ Takthai e pouknae teh duenae doeh. Muitha e pouknae teh hringnae hoi lungmawngnae doeh.

⁷ Bangtelah tetpawiteh takthai counгнаe lungthin teh Cathut hoi kâtaran e lah ao. Bangkongtetpawiteh hote lungthin ni Cathut e kâlawk ngainae awmhoeh. Atangcalah tarawi thai hoeh.

⁸ Hatdawkvah takthai lahoi kahringnaw ni Cathut lungkuep sak thai hoeh.

⁹ Hatei, Cathut Muitha nangmouh thung awm pawiteh nangmouh teh takthai dawк laipalah Muitha dawк na o awh. Khrih Muitha ka tawn hoeh e tami teh Khrih e tami nahoeh.

¹⁰ Hatei Khrih teh nangmae thungvah awm pawiteh takthai teh yon kecu kadout nakunghai muitha teh lannae kecu dawк a hring han.

¹¹ Hothloilah Jisuh hah duenae koehoi kathawsakkung Cathut e Muitha teh nangmae thungvah awm pawiteh, Khrih hah duenae koehoi ka thaw sak e Cathut ni nangmouh thung kaawm e amae Muitha lahoi kadout thai e nangmae tak hai a hring sak han.

¹² Hatdawkvah hmaunawngghanaw, maimouh teh takthai ngainae patetlah hring hanelah, takthai counгнаe dawк san lah awm awh hoeh .

¹³ Bangkongtetpawiteh, nangmouh teh takthai ngainae patetlah na hring awh pawiteh, na due awh han. Hatei Muitha ngainae lahoi takthai ni a tawksak e naw hah na dout sak awh pawiteh na hring awh han.

¹⁴ A lamthung teh Cathut Muitha ni a hrawi e naw pueng teh Cathut e canaw lah o awh.

¹⁵ Nangmanaw teh bout ka taket thai e san muitha na coe a hoeh. Cacoungnae Muitha doeh na coe awh. Hote muitha dawkh hoi Abba Apa telah maimouh ni kaw awh.

¹⁶ Maimanaw ni Cathut e canaw lah onae teh Muitha ama roeroe ni maimanaw e muitha hoi cungtalaha a kampangkhai.

¹⁷ Hottelah a canaw lah awm awh toung pawiteh a râw ka pang e lahai o awh. Khrih hoi a bawilenna rei hmawng nahanelah, reithainae hai rei khang awh pawiteh, Cathut e a râw ka pang hanelah hai o awh.

Hmalah A bawilenna hoi ngai hawinae

¹⁸ Atu mithmu vah reihathainae naw pueng teh maimouh ni pang lah kaawm hane bawilenna hoi bangnue pawiteh dei han kamcu hoeh telah ka pouk.

¹⁹ Hete sak e hno cawngca ni Cathut e canaw a kamnue nahane hah doun laihoi a ngaihawi awh.

²⁰ Bangkongtetpawiteh, sak e hno cawngca pueng teh banglahai cungkeihoeh toe tie teh ama ngai lahoi nahoe, hottelah kahruengkung ngainae lahoi doeh.

²¹ Sak e hno cawngca pueng teh kamkonae dawkh hoi a hlout teh, Cathut e a canaw e bawilenna hoi ka kuep e dawkvah a kâen han tie ngaihawinae ao dawkh doeh.

²² A sak e hno cawngca pueng teh atu totouh a cingou teh ca khe reithainae a khang tie hah panue awh.

23 Hothloilah Muitha e a luepaw hmaloe ka coe e maimouh nihaiyah cacoungnae tie maimae takthai ratangnae hah ngaihawi laihoi lungthung vah cingou awh.

24 Maimouh teh hete ngaihawinae ni rungn-gang lah na o sak. Hatei hmu thai e hateh ngaihawinae nahoe. Bangkongtetpawiteh, apini-maw hmuthai e hno hah khuet bout a ngaihawi han vaw.

25 Hmuthaihoehe maimouh ni ngaihawi awh pawiteh hote hno hah panguap lahoi ngaihawi awh.

26 Hot patetvanlah Muitha nihaiyah maimae thayounnae koe na kabawp awh. Maimouh ni ratoum hane patetlah bang patet e hno maw ka ratoum han tie panuek awh hoe. Hatei, Muitha ama roeroe ni lawk hoi a pâpho thai hoe e cingounae lahoi maimouh hanlah na hei pouh.

27 Lungthin ka khien e Bawipa ni hai Muitha e lungthin hah a panue. Bangkongtetpawiteh Muitha ni Cathut ngainae patetlah tami kathounghaw hanelah na hei pouh awh.

28 Cathut ni a lungpataw teh, a pouk tangcoung e patetlah a kaw e naw hanelah, hnocawngca pueng ni hawinae koe lah doeh reirei a kâroe pouh tie teh panue awh.

29 Bangkongtetpawiteh, A panue tangcoung e naw hah amae Capa mei kâlat lah sut a hmoun toe. Hethateh hmaunawngghanaw thung dawc camin lah ao nahane doeh.

30 Hottelah sut a hmoun e naw hah ama ni a kaw teh, a kaw e naw hah a lansak, a lansak e naw hah a bawilen sak.

Kayuemnaw ni tânae

³¹ Telah boipawiteh hete hnonaw pueng khetsin hoi bangtelamaw dei han. Cathut maimouh koelah kampang pawiteh apinimaw maimouh na tuk thai han.

³² A Capa patenghai pasai laipalah maimouh hanlah na kapoekung ni a Capa hoi cungtalalah hnocawngca pueng teh poe laipalah ao han na maw.

³³ Cathut ni a rawi tangcoun e naw teh apinimaw yon a pen han. Na lan toe katetkung teh Cathut a ma doeh toe.

³⁴ Apinimaw yon phu bout na khang sak han. A due dueng laipalah duenae koehoi ka thaw e Khrih Jisuh teh Cathut e aranglah ao teh, maimouh hanelah na ratoum pouh awh.

³⁵ Apini maw maimouh heh Khrih e lung-patawnae daw k hoi na kapek thai han. Roedeng-nae, patawpanatnae, rektapnae, kahaikahlam-nae, caicinae, takithonae hoi tahloi ni na ou.

³⁶ Maimouh teh kanîrui Bawipa hanlah duenae hoi kâhmo awh. Maimouh teh thei hanlah hmoun e tunaw patetlah na pouk awh telah Cakathoung daw k thut e patetlah doeh ao.

³⁷ Maimouh teh, maimouh lungpatawkung Bawipa lahoi yah, hote hnonaw kâhmo awh lahun nah, khoeroe tâ e lah o awh.

³⁸ Bangkongtetpawiteh, duenae thoseh, hring-nae thoseh, kalvantaminaw thoseh, ka ukkung-naw thoseh, atu hmu thai e hnonaw thoseh, ka tho hane hnonaw thoseh, hnotithainae thoseh,

³⁹ kahlun lae hno thoseh, rahim lae hno thoseh, sak e cawngca pueng hai thoseh, maimae Bawipa

Khrih Jisuh thung kaawm e Cathut e lungpataw-nae hoi bang ni hai na kapek thai mahoe.

9

Isarelnaw hoi Cathut e lawkkam

¹ Kai teh Khrih dawk laithout laipalah lawkkatang ka dei han. Kaie thoehawi panuenae teh Kathoung Muitha lahoi kai hoi cungtalah kampangkhai teh,

² Kai dawk puenghoi lungmathoenae hoi ka lungthung vah lungpuennae pou ka tawn.

³ Bangkongtetpawiteh, takthai lahoi ka mipun lah kaawm e ka hmaunawngghanaw hanelah kama roeroe Khrih hoi kampek vaiteh thoebonae khang han totouh ngainae ka tawn.

⁴ Ahnimouh teh Isarel mipun lah ao teh cacoungnae, bawilennae, lawkkamnae, kâlawk poenae, bawknae teh ahnimouh hoi ka kâkuen e lah ao.

⁵ Mintoenaw teh ahnimouh hoi a kâkuet teh, Khrih hai tami lahoi teh ahnimouh thung hoi a tâco. Hote Bawipa teh bangpuengpa e lathueng vah ao teh, a yungyoe yawhawinae Cathut lah ao. Amen.

⁶ Bangtelah nakunghai thoseh, Cathut lawkkam teh raphoe e lah awmhoeh. Bangkongtetpawiteh Isarel catoun lah kaawm e pueng Isarel mipun lah awm awh hoe.

⁷ Abraham e catoun lah kaawm e pueng Abram e ca katang lah koun awmhoeh. Isak koehoi e catoun doeh nange catoun lah kaw han tie lah ao.

⁸ A deingainae teh takthai lahoi khe lah kaawm e taminaw teh Cathut e ca lah awmhoeh, lawkkam dawkhoei khe e tami dueng doeh a miphun lah a khoe.

⁹ Bangkongtetpawiteh lawkkam dawkvah het patet e tueng a pha navah, bout ka tho han. Sarah haiyah capa a khe han telah ati.

¹⁰ Hot dueng nahoe, Rebekah hai maimae mintoe Isak hoi yuvâ lah ao teh camo a vawn navah,

¹¹ A ca khe hoehnahlan, a canaw ni a thoe hawi banghai a panue awh hoehnahlan hoiyah, Cathut ni a rawinae lah kaawm e a pouk tangcoung e hah, thaw tawknae lahoi laipalah, a kawnae lahoi caksak nahanlah,

¹² Ca kacue e teh kanaw koe san lah ao han telah sut a dei pouh toe.

¹³ Jakop teh ka lungpataw, Esaw teh ka hmuhma telah Cakathoung dawkhut e patetlah doeh ao.

Cathut e rawinae

¹⁴ Telah boipawiteh maimouh ni bangtelamaw dei han toung. Cathut teh lanhoehnae lah maw ao toung. Khoeroe awmhoeh.

¹⁵ Bangkongtetpawiteh Cathut ni Mosi koe, lungma han ka ngai e tami hah ka lungma teh, pahren han ka ngai e tami hah ka pahren han telah ati.

¹⁶ Hatdawkvah het hateh, tami e ngainae hoi kâyawmnae dawkhoei tho hoe, lungpatawkuang Cathut kâ lah doeh ao.

¹⁷ Cakathoung dawkhoei Faro siangpahrang koe nang hah kai ni na tawmnae teh, nang koe kama

e bahu ka kamnue sak vaiteh, talai van pueng dawk ka min kamthang sak nahane doeh telah ati.

¹⁸ Hatdawkvah, Cathut ni a pahren ngai e hah a pahren teh, a lungpata sak hanlah a ngai e hah a lungpata sak.

¹⁹ Hatnavah nang ni, telah pawiteh Cathut ni bangkongmaw taminaw hah yon a pen vaw. Apini maw Cathut ngainae teh a taran thai han vaw telah na pacei han.

²⁰ Hatei, oe nange tami, nang teh banglah maw na o teh Cathut hah bout na pato ngam vaw. Sak e hno ni kasakkung koe bangkongmaw hettelah na sak atipouh thai han maw.

²¹ Hlaam kasakkung ni amhru dawk kâ tawn hoeh na maw. Hote amhru hah hlaam bari kaawm hoi bari kaawm hoeh e sak thainae kâ tawn hoeh na maw.

²² Hatei, Cathut ni a lungkhueknae a kamnue sak hane hoi amae bahu panue sak hanelah, a ngainae ao nahlangva vah, raphoe hanlah ta e, lungkhueknae hlaamnaw hah, lungsaw poun lahohi panguap pawiteh, bangtelamaw .

²³ Hathloilah, a lentoe nahanlah sut rakueng e, lungmanae hlaamnaw dawkvah, amae baw-illennae hah panue sak nahanelah sak pawiteh bangtelane.

²⁴ Cathut ni maimanaw teh hote lungmanae hlaamnaw lah, Judahnaw thung dueng laipalah, Jentelnaw pueng koe haiyah na kaw e lah o toe.

²⁵ Hosi cauk thungvah, Cathut ni ka tami lah kaawm hoeh e hah, ka tami telah ka kaw han,

ka pahren hoeh e napui hah ka pahren telah ka kaw han ati.

²⁶ Nangmanaw teh ka tami nahoe h telah tinae hmu en koe nangmouh teh ka hring Cathut e a canaw telah na kaw awh han telah ati e patetlah ao.

²⁷ Isaia h nihai, Isarelnaw kong daw k a dei e teh, Isare l canaw teh tui pui rai e sadi yit touh ka phat nakunghai kacawie dueng rungngang lah ao han.

²⁸ Bangkongtetpawite h Cathut ni a thaw teh cum hoeh roukrak taw k vaite h, lannae hoi a taw k han. Bawipa ni talai van a thaw teh a kuep sak vaite h kâhat laipalah ka taw k han telah a hramkhai.

²⁹ Hothloilah Isaia h ni, kalvan ransabawi yungyoe kahring e Cathut ni maimouh hanlah catoun pek hoe hpawite h, Sodom hoi Gomorrah khopui hoi doeh kâvan awh ti telah sut a dei e patetlah ao.

Isarelnaw payonnae

³⁰ Telah pawite h, maimouh bangtelamaw dei awh han toun g. Lannae ka pâlei hoeh e Jentelnaw ni lannae teh a coe awh toe. Hothate h, yuemnae lahoi coe e lannae lah ao.

³¹ Lannae hoi kâkuen e phung coe hanelah ka pâlei e Isare l miphun naw teh hote phung hah phat thai awh hoeh.

³² Bangkongmaw a pha thai awh hoeh. Yuemnae hoi laipalah tawksaknae daw k hoi kâyawm e lah ao daw k doeh. Ahnimouh teh talung daw k kamthui teh a tâlaw awh toe.

³³ Khenhaw! Zion vah tâlawnae lungsong, payonsakkung talung hah kai ni ka hruek. Apihai ama ka yuem e tami pueng teh kayak mahoe h telah Cakathoung daw k thut e patetlah ao.

10

Yuemnae lahoi coe e rungngangnae

¹ Ka hmaunawngghanaw Isarelnaw ni rungngang lah ao thai nahanelah ka ngaikhai poung dawkvah Cathut koe pou ka ratoum.

² Ahnimouh ni Cathut hanelah puenghoi a lungthao awh e hah kai ni ka kampangkhai. Hatei, ahnimae a lungthaonae teh panuenae katang lah awmhoeh.

³ Ahnimouh ni Cathut e lannae a lamthung panuek a hoeh. Amamae lannae caksak hanelah a tawng awh dawkvah, Cathut e lannae daw k kâen thai a hoeh.

⁴ Kayueme tami pueng ni lannae koe pha thai awh nahanlah Khrih teh kâlawk poutnae doeh.

⁵ Mosi ni kâlawk lahoi kâkuen e lannae kong daw k a thut e teh, apihai hote kâlawk ka tarawi e pueng teh hotnaw lahoi a hring han, a ti.

⁶ Yuemnae lahoi coe e lannae teh, nange na lungthung vah kalvan lah apimaw ka luen han tet hanh. A deingainae teh Khrih hah kum khai han ti ngainae doeh.

⁷ Nahoe h pawiteh, adungpoungnae koe apimaw ka kum han telah hai tet hanh. A dei ngainae teh Khrih hah duenae koehoi tâcokhai han tinae doeh.

⁸ Bout a dei e teh phung lawk teh na teng vah ao. Na pahni dawk hai, na lungthung hai ao ati. Het hateh kaimouh ni ka pâpho awh e yuemnae lawk hah doeh.

⁹ Jisuh teh Bawipa doeh telah na pahni hoi na dei teh, na lungthung hoi Cathut ni ahni teh duenae koehoi a thaw sak toe telah na yuem pawiteh rungngang lah na o han.

¹⁰ Lannae koe pha hanelah lungthin hoi yuem han, rungngangnae koe pha hanelah pahni hoi pâpho han.

¹¹ Bangkongtetpawiteh, Cakathoung ni, hote talung ka yuem e pueng teh kayak mahoe a ti.

¹² Het dawkvah Judahnaw hoi Griknaw rahak kapeknae awmhoeh. Bangkongtetpawiteh tami pueng ka uk e Bawipa buet touh dueng ao teh Ama ka kaw e pueng teh yawhawinae kakhoutlah a poe.

¹³ Bangkongtetpawiteh Bawipa min ka kaw e pueng rungngang lah ao han.

Kamthang kahawi thainae lahoi yuemnae

¹⁴ Hateiteh ma ni yuem hoeh e Bawipa hah bangtelamaw kaw thai han vaw. Na thai boihoeh e Bawipa hah bangtelamaw na yuem thai han vaw. Kapâphokung awm laipalah bangtelamaw thai thai han vaw.

¹⁵ A tami patoun laipalah bangtelamaw pâpho thai han vaw. Hot patetlah Cakathoung dawktut e patetlah, roumnae kamthang kahawi ka pâpho e, lunghawinae kamthang kadeikungnaw e khok teh a meihawipoung.

¹⁶ Hateiteh, tami pueng ni lunghawinae kamthang thai ngai awh hoeh. Profet Isaiah ni a dei e teh, Oe! Cathut kaimae kamthang kahawi apinimaw a yuem han, a ti.

¹⁷ Hatdawkvah yuemnae teh thainae koehoi a tho teh, thainae teh Khrih e a lawk lahoi doeh a tho.

¹⁸ Hatei, pacei han ka ngai e teh, ahnimouh ni thai awh hoeh maw. A thai tOUNg te., Ahnimae hramnae lawk teh talai van pueng a kamthang teh ahnimae a lawk teh talaivan a pout totouh a pha, telah a dei.

¹⁹ Bout na pacei ngai e teh Isarelnaw ni panuek awh hoeh maw. Ahmaloe vah Mosi ni nâyittouh hoeh e miphun lahoi nangmouh koe utnae lungthin ka tâco sak teh, panuenae ka tawn hoeh e miphun lahoi yah, na khang thai hoeh hane totouh ka tâco sak han a ti.

²⁰ Profet Isaiah nihai, kai ka tawng hoeh e naw ni kai hah na hmu awh. Kaie kong ka pacei hoeh e naw koe kamahoima kamphawng pouh han telah taranhawi laihoi a ti.

²¹ Hatei, Isarelnaw hoi kâkuen lah, lawk ka ngâi hoeh e, ka taran lah kaawm e naw koe kai ni kanîrui kut ka na sin toe atipouh.

11

Lungmanae lahoi rawinae

¹ Telah pawiteh, Cathut ni amae miphunnaw a pahnawt tOUNg telah na pacei pawiteh pahnawt hoeh, kai hai Isarel miphun, Abraham koehoi ka tho e, Benjamin catoun lah ka o.

² Cathut ni sut a panue tangcoung e taminaw pahnawt hoeh. Profet Elijah ni, Isarelnaw Cathut koe a thaisak navah Cakathoung dawkw bangtelamaw a thut tie na panuek awh hoeh maw.

³ Ahni ni, Oe Cathut, ahnimouh teh Bawipa nange profetnaw hah a thei awh toe. Bawipa nange thuengnae khoungroenaw a raphoe awh toe. Kai buet touh dueng doeh kaawm toe. Kai hai thei hanelah na tawng awh toe telah a dei.

⁴ Hatei, Cathut ni bangtelamaw a dei pouh tetpawiteh, Baal hmalah khok cuengkhuem hoeh e tami thong sari touh kama hanelah ka pek toe telah atipouh.

⁵ Hot patetvanlah atu tueng haiyah, lungmanae lahoi rawi e acawinaw ao rah.

⁶ Hatei, lungmanae lahoi boipawiteh tawksaknae lahoi nahoeh toe. Hoehpawiteh lungmanae teh lungmanae lah awm mahoe.

⁷ Hottelah pawiteh bangtelamaw. Isarel miphunaw ni panki laihoi a tawng awh e hno hah hmawt a hoeh. Rawi e lah kaawm naw ni dueng doeh a hmu awh. Aloukenaw teh a lungpata awh.

⁸ Cathut ni ahnimouh koevah atu totouh a lungthin pueng a ramuk pouh. Ka hmawt thai hoeh e mit, ka thai thai hoeh e hnânaw hah a poe telah Cakathoung dawkw a thut e patetlah atu a kuep toe.

⁹ Devit ni hai a dei e teh, ahnimae caboi teh tangkam patung e lah, karap patung e lah, payonsakkung lah, moipathung hanelah awm naseh telah a ti.

¹⁰ Ahnimanaw e mit teh hmu thai hoeh totouh dawn naseh. Ahnimae keng hai hnamkhun yungyoe seh telah a ti.

Jentelnaw koe ka phat e rungngangnae

¹¹ Hat pawiteh, Isarelnaw ni a rawp totouh a kamthui awh toung maw telah na pacei. Telah nahoe. Ahnimouh payonnae lahoi Jentelnaw koe rungngangnae a pha teh, Isarelnaw ni utsinnae a tawn awh nahane doeh.

¹² Hatei, ahnimae payonnae ni talaivan taminaw hanelah yawhawinae a tâcokhai. Ahnimae sungnae ni Jentelnaw hanlah yawhawinae tâcawtkhai pawiteh, ahnimae kuepnae ni teh banghloimaw hawinae hoe a tâcokhai han.

¹³ Hottelah ka ti nah, kai teh Jentelnaw koe patoun e guncei lah ka o e patetlah,

¹⁴ hote thaw tawknae daw kâoup teh, ka miphunnaw e pouknae hah buetbuet touh lahoi utsinnae a tawn awh vaiteh rungngang lah ao awh thai nahanelah ka ngaihawi.

¹⁵ Bangkongtetpawiteh, ahnimouh pahnawt lah a onae teh talaivan taminaw hanlah bout kâmaihawi lah awm pawiteh, ahnimouh bout coenae teh kadout tangcung naw hanlah due-nae koehoi bout hringnae lah kaawm han nahoehmaw.

¹⁶ Aluepaw lah thueng e tavai teh thoung pawiteh abuemlah a thoung han. A khongyang thoung pawiteh, a kang naw pueng hai a thoung han.

¹⁷ A tangawn e a kang naw teh tâtueng vaiteh, kahrawng e Olivekung lah kaawm e nang hah hote a kangnaw dawkvah, pacawng laihoi Olive

khongyang dawk e tui na kahmawng e lah na awm pawiteh,

¹⁸ hote cakang naw e lathueng kâoupnae lungthin tawn hanh. Na kâoup han na ngai pawiteh, nang ni a khongyang na doun hoeh, khongyang ni doeh nang teh na doun.

¹⁹ Hattoteh nang ni kai hah na pacawng nahanelah a kangnaw teh bouk lah ao na ti han doeh.

²⁰ Bokheiyah. Ahnimouh a yuem hoeh dawk tâtueng lah ao teh, nang teh yuemnae lahoi doeh na cak. Kâoupnae tawn hanh, takinae tawn haw.

²¹ Bangkongtetpawiteh, Cathut ni apasuek e a kangnaw pasai hoehpawiteh, nangmouh hai na pasai mahoe.

²² Hatdawkvah Cathut ni lawkcengnae hoi lungmanae hah khenhaw! Lawkcengnae teh ka rawm e taminaw lathueng ao teh, Cathut lungmanae teh nang ni hote lungmanae daw pou na awm pawiteh, nang koevah ao. Pou na awmhoeh pawiteh nang haiyah tâtueng lah na o han.

²³ Ahnimanaw pueng hai yuemhoehnae tâkhawng awh pawiteh, a kang daw patawp lah ao awh han. Bangkongtetpawiteh ahnimanaw pueng bout patawp hanelah Cathut ni a sak thai.

²⁴ Bangkongtetpawiteh nang teh kahrawng e Olivekung daw hoi tâtueng e lah na o teh, kahawi e Olivekung daw kaawm boihoe e patawp e lah na awm pawiteh, kaawm boi e Olive kangnaw teh a kung karuem daw banghloimaw bout patawp hanelah a yawi han.

Isarel miphunnaw e rungngangnae

²⁵ Hmaunawnghanaw nangmanaw, kâoupnae lungthin na tawn hoeh nahanelah, Jentelnaw pueng a kâen hoehnahlan totouh Isarel tami tangawn teh hmonae ni a ramuk e hrolawk heh panuek laipalah na o sak hanelah na ngaikhai awh hoeh.

²⁶ Hote Cakathoung dawк e patetlah Isarelnaw pueng rungngang lah ao awh han. Cakathoung ni a dei e teh, ka hloutkhaikung Bawi teh Zion mon dawк hoi a tho vaiteh, Jakop e miphun dawк hoi tami kahawi hoeh naw koung a raphoe han.

²⁷ Ahnimouh a yonnae pueng ka tâkhawng pouh toteh ahnimouh koe kai ni ka poe hane lawkkam doeh telah Ca Kathoung dawк thut e patetlah ao.

²⁸ Ahnimanaw teh kamthang lawkkahawi kecu dawк nangmae taran lah kaawm nakunghai rawinae dawк teh mintoenaw pawlawк dawк pahren lah ao awh.

²⁹ Bangkongtetpawiteh, Cathut e poehnonaw hoi kawnae teh bout kâthung hoeh.

³⁰ Nangmouh pueng teh ahmaloe vah Cathut e lawк na ngâi awh hoeh eiteh, atuteh ahnimae lawkngâihoehnae ni pahrennae na coe sak toe.

³¹ Hot patetvanlah nangmouh ni na coe e pahrennae lahoi yah, ahnimanaw hai pahrennae a coe thai nahan, atuvah ahnimanaw teh lawkn-gai laipalah ao awh.

³² Cathut ni tami pueng pahrennae tawn thai nahanlah taminaw lawк ngaihoehnae dawк a paung.

³³ Cathut e lungangnae hoi poukthainae a dungkawnae teh a dungkaw tangngak doeh. Lawkcengnae naw apinimaw koung a panue thai han. A lamthungnaw tawng nakunghai hmawt thai hoeh.

³⁴ Cathut e a pouknae apimaw ka panuek, BAWIPA hoi apimaw ka kâpan.

³⁵ Kahawi hno saknae pathung thai nahan, a yungyoe Cathut dawk apine hnokahawi ka sak.

³⁶ Hno cawngca pueng teh Bawipa koehoi, Bawipa lahoi, Bawipa hanelah ao awh. Bawipa teh a yungyoe bawilenna awm lawiseh. Amen.

12

Muitha koe lah thaw tawknae

¹ Hatdawkvah, hmaunawngghanaw nangmouh na hroecoe ngainae teh Cathut pahren lahoi nangmae na tak teh, Cathut ngai e lah kaawm e kathoung ni teh kahring e sathei lah thueng awh. Hethateh, nangmouh ni na tawk kawi lah kaawm e muitha koelae thaw doeh.

² Nangmouh teh, talaivan meilam kâmahrawk awh hanh. Cathut ni ngai e lah kaawm e kahawi e hno, ngai kaawm e hno, ka kuep e hnonaw hah kapek teh panue thai nahanlah lungthin katha pathoupnae lahoi meilam kâthungnae tawn awh.

³ Cathut lungmanae lahoi na poe lah kaawm e nangmouh koe dei hanlah ka ngai e teh, mahoima hoe kârasang laipalah Cathut ni thaw buetbuet touh na rei tangcoung e patetlah pouk awh.

⁴ Bangkongtetpawiteh, tak buet touh dawк puengcang moikapap lah ao eiteh, hote puengcangnaw ni thaw buet touh e dueng rip tawк a hoeh.

⁵ Hot patetlah moikapap e maimouh teh Khrih thung tak buet touh lah o awh teh lengkaleng a cakang lah o awh.

⁶ Hottelah na poe e poehnonaw aphunphun coe awh e patetlah, aloukloukcalah coe awh dawкvah, sutdeilawк ka coe e lah awm pawiteh yuemnae a coe e patetlah pâpho naseh.

⁷ Ayâ hanlah thaw ka tawк hanelah na awm pawiteh, hottelah tawк hanelah ao. Kacangkhaikung saya hanelah na awm pawiteh cangkhainae thaw tawк hanelah ao.

⁸ Kahroecoekung hanelah na awm pawiteh hroecoenae thaw tawк hanelah ao. Poe pasoung hanelah na awm pawiteh lungtho thahmei lahoi poe pasoung hanlah ao. Ka ukkung hanelah na awm pawiteh lungtho tha patung laihoi uk hanlah ao. Kabawp hanelah na awm pawiteh lungthocalah hoi kabawp hanlah ao.

Kayuemnaw e lungpouk

⁹ Lungpatawnae teh kâsaknae awmhoeh. Kathout e hno panuet awh. Kahawi hno dawк lungpen awh.

¹⁰ Hmaunawnggha lungpatawnae dawк buet touh hoi buet touh kâlungma awh. Kâbari awh nateh, ayânaw kai hlak bet ahawi telah pouk awh.

¹¹ Pangak laipalah na thahmei sak awh nateh, lungkânging lahoi Bawipa e thaw tawк awh.

¹² Ngaihawinae dawk lunghawi awh. Rucat na kâhmo awh nah panguep awh. Ratoum yungyoe awh.

¹³ Tami kathoungnaw e a pankinae hah poe pasoungnae hoi ka bawm awh nateh, imyinnaw kahawicalah khenyawn awh.

¹⁴ Nangmouh na ka rektap e naw hanelah ratoum pouh awh. Yawhawi poe awh nateh thoebo awh hanh.

¹⁵ A kokanawmnaw hoi cungtalalah konawm awh. Kakhuikapnaw hoi cungtalalah khuikap awh.

¹⁶ Buet touh hoi buet touh lungthin kânging awh. Kâoupkâpawi laipalah, sue touh lah kâkhen awh. Namahoima kathoum ka thai kâtet awh hanh.

¹⁷ Apihai bout pathung a hanh awh. Taminaw hmalah nangmouh ni bari kaawm e sak hanlah kâcai awh.

¹⁸ A coung thai totouh tami puenghoi kâpolah awm awh.

¹⁹ Ka pahrennaw, nama ni pathung laipalah a lungkhueknae kut dawk hnawng awh. Bangkongtetpawiteh Cathut ni a dei e teh, pathungnae teh Kaie doeh ati. Kai ni ka pathung han ati telah Cakathoung dawk thut e lah ao.

²⁰ Hatdawkvah kut pathung laipalah, na taran vonhlan pawiteh pacapanei awh. Tui kahran pawiteh tui pânei awh. Hottelah na sak e lahoi ahnie lû dawk hmaisaan na pâpawp pouh han.

²¹ Kathout e lahoi ta awh laipalah, kahawi e hno hoi kathoute hah tâ haw.

13

Ukkung bawinaw hoi kâkuetnae

¹ Lathueng lae ukkungnaw e kâ teh tami pueng ni ngai awh naseh. Cathut koehoi laipalah kâtawnnae tie awmhoeh. Atu kaukkungnaw heh Cathut ma ni a poe e doeh.

² Kaukkungnaw ka taran e teh Cathut ni kâ poe e ka taran e lah ao. Hottelah ka taran e naw teh yon lawkcengnae ama ni a kâhmo awh han.

³ Bangkongtetpawiteh, kaukkungnaw heh hawinae ka sak e taminaw hanelah taki hane awmhoeh. Hno kahawihoeheh ka sak naw hanelah doeh taki hanelah ao. Hottelah na sak pawiteh ahnie oupnae na pang han.

⁴ Hatdawkvah ahnimouh teh nang hane hnokahawi kasakkung Cathut e san doeh. Hatei hno kathout na sak pawiteh takinae tawn lawih. Ahnimouh teh tahloi ayawmlah patuem awh hoeheh. Ahni teh hno kathout ka sak naw hanlah a lungkhueknae yon lawkcengkung Cathut e san doeh.

⁵ Hat pawiteh, a lungkhueknae dawkw dueng laipalah thoeahawi panue e lahoi hai ngai awh.

⁶ Het kecu dawkw nan ou, tamuk naw hai na poe awh. Nangmouh teh Cathut e thaw katawknaw lah na o awh teh hote thaw doeh pou na tawkw awh.

⁷ Hatdawkvah tami tangkuem hai poe kamcu e hah poe awh. Tamuk poe kamcu e naw hah tamuk poe awh. Cawng e poe tueng e naw hah cawng pouh awh. Taki tueng e naw hah taket awh. Bari kamcu e naw hah bari awh.

Buet touh hoi buet touh lungkâpatawnnae

⁸ Lungpatawnae hloilah, bang patet e laiba hai tawn awh hanh. Ayâ lung ka pataw e ni kâlawk a kuep sak toe.

⁹ Bangkongtetpawiteh, uicuk hanh, tami thet hanh, parawt hanh, radueknae lung tawn hanh tie kâpoelawk koehoi kamtawng teh, alouke kâlawk bangpatet hai, nama hoi kâkuen e hah nama hoi kâvan lah lungpataw tie kâlawk daw k koun a kâkuet.

¹⁰ Lungpatawnae ni teh a tengpam huiko naw koe, hawihoe hnae sak hoe. Hatdawkvah, lungpatawnae teh, kâlawk ka kuepsakkung lah ao.

¹¹ Nangmanaw ni, a tue teh na panue awh. Nangmouh inae koehoi kâhlah nahane tueng a pha toe. Bangdaw k ne tetpawiteh atu maimae rungngangnae teh maimouh yuemnae hnin hla k hoehoe a hnai toe.

¹² Karum meimei aloum teh, kho meimei a dai toe. Hatdawkvah maimanaw teh ka hmawt e nuencangnaw takhoe vaiteh angnae nuencang naw khohnat awh sei .

¹³ Caneinawmnae, yamuhrinae, kam-soumhoehe napui tongpa yonnae hoi takngainae, kâpokâdanghoe hnae hoi kâutnae daw k pawngpa laipalah khodai ceio e patetlah mitkhet kamcu lah khosak awh sei.

¹⁴ Bawipa Jisuh Khrih hah khohnat awh. Tak-thai lungradueknae thap sin hanelah kâcai awh hanh.

14

Kayuem reira kâkuetnae

¹ Yuemnae dawk a tha ka youn e taminaw hah dâw awh. Pouknae aphunphun dawk oun awh hanh.

² Tami tangawn ni bangpuengpa ca thai tie a yuem awh. Hatei, yuemnae dawk a tha kayoun e naw teh anhla dueng doeh a ca awh.

³ Ka cat e ni ka cat hoeh e naw hnepnap hanh naseh. Ka cat hoeh naw ni hai ka cat naw lawkceng hanh naseh. Bangkongtetpawiteh, Cathut ni ahni teh a coe toe.

⁴ Namahoima hah banglah maw na kângai teh, ayânaw e san hah lawk na ceng vaw. Ahni a kangdue hai thoseh, a rawp hai thoseh, a Bawipa hoi doeh a kâkuet. Hatei, ahni teh a kangdue han, bangkongtetpawiteh, Cathut ni a kangdue sak thai.

⁵ Tami tangawn ni ahnin hnin touh heh alouke hnin naw hlak hoe a talue ati awh. Tangawn ni a hninnaw pueng teh suetouh doeh ati awh. Tami pueng ama ni a pouk e hno dawk a lungkuep naseh.

⁶ A hnin ka ya e ni Bawipa hanlah ya naseh. Ka cat e ni hai Bawipa hanlah cat naseh. Bangkongtetpawiteh, ahni ni Cathut koe a lung-hawi. Ka cat hoeh e ni hai Bawipa hanlah cat laipalah Cathut koe lunghawi naseh.

⁷ Maimouh dawk ma hanlah ka hring e buet touh hai awmhoeh. Ma hanlah kadout e buet touh hai awmhoeh.

⁸ Maimouh ni hring pawiteh Bawipa hanlah hring awh teh, dout pawiteh Bawipa hanlah due awh. Hatdawkvah, maimanaw teh hring hai thoseh, due hai thoseh Bawipa e lah o awh.

⁹ Bangkongtetpawiteh, Khrih teh kadout tangcoungnaw hoi kahringnaw han ukkung Bawi lah ao hanlah duenae koehoi bout a thaw toe.

¹⁰ Telah pawiteh, bangkongmaw nang ni na hmaunawngghanaw hah lawk na ceng teh na dudam vaw. Maimouh pueng teh Khrih e lawkcengnae tungkhung hmalah kOUNg kangdue awh han.

¹¹ Bangkongtetpawiteh, BAWIPA ni a dei e teh kai kahring dawK tami pueng ni ka hmalah a khokcuengkhuem awh han. Tami pueng e pahni ni Cathut hah a pholen awh han, telah Cakathoung dawK a thut.

¹² Hettelah dawkvah, maimouh pueng ni Cathut hmalah mae nuencang lengkaleng dei awh han.

Lungpatawnae lahoi thaw tawKnae

¹³ Hatdawkvah, maimouh buet touh hoi buet touh lawkkâceng awh hanh sei. Hahoi, hmaunawnggha tâlaw nahan hoi lam payon nahanlah hno sak awh hanh sei.

¹⁴ AmahmawK kathounghoehe hno buet touh hai awmhoeh tie Bawi Jisuh dawK kacailah ka panue. Hatei, hno buetbuet touh thoung hoeH telah ka pouk e tami hanlah teh hote hno teh thoung hoeH.

¹⁵ Rawca kecu dawK na hmaunawnggha lung mathout sak pawiteh, lungpatawnae dawK na hring hoeH. Khrih ni na due pouh e lungmanae hah nange rawca kecu dawK na hmaunawngghanaw, rawksak awh hanh.

¹⁶ Nangmouh hanlah hno kahawinaw hah yonpen e lah awm sak awh hanh.

¹⁷ Bangkongtetpawiteh, Cathut uknaeram teh caneinae dawk hoi kangdout hoeh. Kathoung Muitha lahoi coe e roumnae, lannae hoi lung-hawinae hah doeh.

¹⁸ Hatdawkvah, hettelah hoi Khrih thaw katawkkungnaw teh Cathut hmalah ngai kawi e lah ao teh, taminaw hmalah hai yuemkamcu e tami lah ao.

¹⁹ Hatdawkvah, roumnae ka tâcawt sak e hnonaw hoi buet touh hoi buet touh hoe kamh-lawm thai nahan panki awh sei .

²⁰ Rawca kecu dawk Cathut thaw hah raphoe awh hanh. Atangcalah hno puengpa teh a thoung. Hatei, buetbuet touh e caneinae ni ayâ hanlah tâlawnae lah awm pawiteh, hot hateh yonnae lah ao.

²¹ Hmaunawngah, kamthui nahanelah awm pawiteh, moi ca hoeh e, yamu neihoehe hoi bangpueng sakhoehe ahawihnawn.

²² Nang ni na tawn e yuemnae teh Cathut e hmalah hrueng awh. Atang titeh coe e hno dawak amae lungthin panuenae kathounge tami teh a lunghawi.

²³ Hatei, lungthounghoehnae hoi na cat pawiteh yuemnae lahoi a tho hoeh dawkvah, yon lawkcengnae hah a khang. Hahoi, bangpueng yuemnae laipalah sak e pueng teh yonnae doeh.

15

Khrih hnuk dawwnae

¹ Maimouh a tha kaawmnaw ni ma ngai e patetlah awm laipalah a thakayounnaw e hnokari hah dounrouk awh sei .

² Maimouh ni hmaunawngghanaw, ahawi nahan sak awh sei. Ahnimouh yuemnae hoe a roungh nahane pouk hanelah ao.

³ Khrih ni ama hane dueng kâkaram hoe. Bawipa kadudamnaw e a lawk teh kai van vah a bo telah Cakathoung dawkh a kâthut.

⁴ Cakathoung dawkh thut e naw pueng teh, maimouh na cangkhai nahanelah thut e lah ao teh, Cakathoung dawkh a thut e panguelpnae hoi lung kâpahawinae lahoi maimouh ni ngaihawinae tawn awh sei .

⁵ Khrih Jisuh e lamthung na panue lai-hoi lungthin buet touh lah coung thai nahan, panguelpnae hoi lung kâpahawinae Bawi, Cathut ni nangmouh na kabawm lawiseh.

⁶ Hottelah doeh lungkângingcalah hoi Bawipa Jisuh Khrih e Pa hah pholen thai awh han.

⁷ Khrih ni Cathut lentoenae a kamnue sak teh, nangmouh na dâw e patetlah nangmouh ni buet touh hoi buet touh kâ dâw awh.

⁸ Bout ka dei e teh, Jisuh Khrih teh Cathut e lawkkatang kamnue sak nahanlah vuensom ka a naw e san lah ao. Hottelah a onae teh mintoenaw koe poe e lawkkam caksak nahane hoi,

⁹ Jentelnaw ni hai lungmanae lahoi Cathut lentoenae a pholen awh nahane doeh. Hatdawkvah Cakathoung ni, kai teh Jentelnaw koehoi nang hah na pholen vaiteh na min teh la hoi ka oup han telah a thut.

¹⁰ Hahoi, Jentelnaw pueng, Cathut e taminaw hoi cungtalalah na konawm awh bout a ti.

¹¹ Hathnukkhu, Jentelnaw pueng Cathut teh pholen awh. Miphun pueng ni Bawipa teh

pholen awh telah bout a ti.

¹² Hahoi Isaiah nihai, Jesi e a catoun koehoi a dâwn a sai han. Ahni teh Jentelnaw uk hanlah ka tâcawt e lah ao. Jentelnaw ni a ngaihawi a vaiteh a kâuep a han telah a dei.

¹³ Kathoung Muitha bahu hoi ngaihawinae kuep nahanelah, ngaihawinae Bawi, Cathut teh yuemnae koehoi ka tho e lunghawinae hoi roumnae puenghoi nangmouh koe kawi lawiseh.

Kamthang kahawi dawk Pawl thaw tawknae

¹⁴ Hmaunawngghanaw nangmouh teh hawinae hoi na kawi awh teh lungangnae aphunphun na tawn awh. Buet touh hoi buet touh na kâ cangkhai awh tie kaimanaw ni ka panue.

¹⁵ Hateiteh hete cauk dawk bout na panue sak hane ka ngai e a konglam hah taranhawi laihoi ka thut. Ka taranhawinae teh Cathut e thaw tawk pouh hanlah Jisuh Khrih e patoun e lah na o sak.

¹⁶ Jentelnaw teh Cathut ni coe han kamcu lah thuengnae lah o thai nahan, Kathoung Muitha lahoi Cathut koe poe e lah ao thai nahan, Cathut koehoi ka tho e kamthang lawk deinae dawk vaihma patetlah ka o.

¹⁷ Hatdawkvah Khrih Jisuh thung bawilenna dawk hoi Cathut e thaw tawknae ka kâuepkhai.

¹⁸ Bangkongtetpawiteh, Jentelnaw hrawi thai nahane teh, Jisuh ni kai hah na hno teh, phunglawk lahoi tawknae dawk hai thoseh,

¹⁹ Mitnoutnaw hoi kângairuna bahu hoi thoseh, Cathut e Kathoung Muitha hoi sak e hnonaw laipateh taranhawi laihoi alouke banghai ka dei ngai hoeh. Hatdawkvah kai teh

Jerusalem kho hoi Illirikum ram totouh ka cei teh Khrih e kamthang kahawi kakueplah ka pâpho.

²⁰ Hottelah ka pâpho navah kai teh ayâ ni a pabo tangcoung e dawk bout ung hoeh nahanlah Khrih kong ka thai bawi hoeh rae ram koevah, kamthang kahawi dei hanlah ka lungtho thahmei laihoi ka panki.

²¹ Cakathoung ni, Bawipa e kong dei pouh boihoeh rae naw ni a hmu awh teh, ka thai boihoeh e naw ni a thaipanuek awh han telah a thut e patetlah ao.

Rom kho cei hanelah Pawl kâcainae

²² Nangmouh koe tho hoeh nahanlah katarawkkung moi apap.

²³ Hateiteh, atu hie hmuen koe o nahane hmuen ao hoeh e dueng laipalah, nangmouh koe tho hanlah kum moikasaw kâcai toe.

²⁴ Hatdawkvah Spain ram lah ka cei toreih teh nangmouh koe tawngtang ka tho vaiteh, nangmouh koe dongdeng ka o han. Hahoi nangmouh ni na thak awh vaiteh hote ram koelah tawngtang ka cei han telah ka ngaihawi.

²⁵ Hatei atuvah dongdeng Jerusalem khopui lah ka cei vaiteh tami kathoung naw e thaw ka tawk pouh han rah.

²⁶ Bangkongtetpawiteh, Masidonia ram hoi Akhaia ram e naw ni, Jerusalem vah kaawm e taminaw thung dawk e ka roedeng e naw hnopai hoi kabawp hanelah a lungtho awh.

²⁷ Ahnimanaw ni lungthonae a tawn awh e patetlah, ahnimouh koe lahoi hai a kabawp awh hanelah atueng van. Bangkongtetpawiteh, Judah naw koe e muitha koelah e hnonaw hah

Jentelnaw ni coe awh van pawiteh, hnopai lahoi hai ahnimae thaw tawk pouh hanelah ao.

²⁸ Hote hno ka cum hoi hete hnopainaw heh ahnimouh koe kahawicalah ka poe vaiteh, nangmouh koe lam lahoi Spain ram lah tawngtang ka cei han.

²⁹ Nangmouh koe ka tho toteh Khrih e kamthang yawhawinae kuep hoi ka tho han tie ka panue.

³⁰ Hmaunawngghanaw, maimae Bawipa Jisuh Khrih hoi Muitha ni na poe e lungpatawnae lahoi nangmouh koe kâhei han ka ngai.

³¹ Kai teh Judah ram e kayuemhoehnaw e kut dawkh hoi kahlout teh, Jerusalem hanelah ka tawk e thaw hah, tami kathoungnaw e hmalah, ngai kawi kaawm lah ao nahan,

³² Cathut ni a ngai e patetlah lunghaw laihoi nangmouh koe ka tho vaiteh, nangmouh hoi cungtalalah lungpahawinae ka coe nahan, panki laihoi kai hane hai ratoum awh loe.

³³ Lungmawngnae Bawi lah kaawm e Cathut teh nangmouh pueng koe reirei awm lawiseh. Amen.

16

Ahnoung Lawk

¹ Kenkhrea kho kaawm kawhmoun thung e thaw katawkkung, ka tawncanu Phoebe heh nangmouh koe panue sak han ka ngai.

² Tami kathoungnaw ni sak kawi kamcu e patetlah Cathut dawkvah ahni hah nangmouh koe awm sak awh nateh, a panki e pueng

kabawm awh. Atangcalah ahni hateh kama koe-hoi kamtawng teh ayânaw pueng hai kabawm e doeh.

³ Khrih Jisuh thung kai hoi thaw rei ka tawh roi e Priscilla hoi Aguila hah kutman pouh awh.

⁴ Hringnae a kâhmoun hoi kai hai na khetyawt toe. Kai dueng laipalah, Jentelnaw e kawhmoun-naw pueng ni hai a lunghawikhai awh.

⁵ Ahni im e kawhmoun hai kutman pouh awh. Asia ram vah Khrih hanelah aluepaw lah kaawm e ka pahren e Epenetas hai kutman awh.

⁶ Nangmouh hanlah thaw ka panki poug e Meri hai kutman awh.

⁷ Kaie miphun lah kaawm e kai hoi thongim rei ka bawt roi e Adronika hoi Junia hai kutman awh. Ahnimouh teh gunceinaw rahak vah a min kamthang e naw a tho teh, kai hlah hai Khrih thung hmaloe kaawm e taminaw doeh.

⁸ Bawipa dawkvah ka pahren e Ampliatus hah kutman awh.

⁹ Khrih thung cungtalah thaw tawh hui Urbanus hoi ka pahren e Satakhi hai kutman awh.

¹⁰ Khrih thung yuemkamcu e Apelles, hai kutman awh. Aristobulus imthungkhu naw hai kutman awh.

¹¹ Ka miphunnaw Herodion hoi Nasisa imthungnaw hai kutman awh.

¹² Bawipa dawkvah thaw ka panki e Triphaena hoi Triphosa tinaw hai kutman awh. Bawipa dawh thaw ka panki e ka pahren e Persis hai kutman awh.

¹³ Bawipa dawh rawi lah kaawm ni teh ka manu lahai kaawm e Rufus e manu hai kutman awh.

¹⁴ Asyncritus, Phlegon, Hermes, Patrobas, Her-mas, tinaw hoi ahnimouh koe kaawm e hmau-nawngghanaw hai kutman awh.

¹⁵ Filolokus, Julia, Nereus hoi a tawncanu, Olimp-as hoi ahnimouh koe kaawm e Bawipa e tami kathoungnaw pueng hai kutman awh.

¹⁶ Buet touh hoi buet touh kathounge kâpaconae hoi kutman awh. Khrih e kawhmounnaw pueng ni nangmanaw kut na man awh.

Kâhruetcu-et nahan hroecoenae

¹⁷ Hmaunawngghanaw panue tangcoung e cangkhai e naw hah sak awh nateh, kampek sak e hoi payonnae ka pung sak e taminaw hah kâhruetcu-et awh nateh roun awh ti teh na hroecoe awh.

¹⁸ Bangtelah tetpawiteh, Bawipa Jisuh Khrih thaw tawk awh laipalah, amamae vonpui thaw dueng a tawk awh teh, ouphlawpnae lawk hoi na tawmpalue awh teh, kamawnggramenaw hah a dumyen awh.

¹⁹ Nangmae lawkngainae tami pueng koe a kamthang dawkvah nangmouh koe ka lung-hawi. Hattelah dawkvah kahawi hno daw-k lungang awh nateh, kahawihoehe daw-k teh yon kanuen-hoehe lah awm awh.

²⁰ Roumnae Bawi lah kaawm e, Cathut ni a ro hoehnahlan Setan teh nangmae khok rahim vah reppasei lah ao sak han. Maimae Bawipa Jisuh Khrih e lungmanae teh nangmouh hoi cungtal-ah awm lawiseh.

²¹ Kai hoi thaw tawk hui lah kaawm e Timote, ka miphun Lusius, Jason hoi Sosipater tinaw ni kut na man awh.

²² Hete ca na ka thut pouh kung kai Teratias ni Bawipa dawkw nangmanaw kut na man awh.

²³ Kawhmoun abuemlah kamkhuengnae imkung Gaius ni hai kut na man awh. Kho thung e tangka kuen e Erastas hoi hmaunawnggha Quartus ni hai nangmanaw kut na man awh.

²⁴ Maimae Bawipa Jisuh Khrih e lungmanae teh nangmouh puenghoi rei awm lawiseh. Amen.

²⁵ Kai ni ka dei e kamthang kahawi hoi Jisuh Khrih e a kong ka dei dawkvah thoseh,

²⁶ talaivan a kamtawng hoi hro lah ao eiteh, atuteh ayungyoe Cathut e kâpoelawkw lahoi yah profetnaw e cauknaw dawkw a kamnue toung dawkvah, yuemnae hoi kâkuen e lawkngainae ao nahanelah, miphun pueng koe panue sak e, hrolawkw pâphonae dawkw hoi thoseh,

²⁷ lungangnae hoi ka kaw i e buet touh dueng e Cathut dawkw Jisuh Khrih lahoi a yungyoe bawilenna awm lawiseh. Amen.

Thai Phum Holy Bible

The Holy Bible in the Thaiphum Chin language of Myanmar

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-01

PDF generated using Haiola and XeLaTeX on 19 Dec 2025 from source files dated 12 Dec 2025

84c7fe95-3b68-5ab6-b17e-a642d33ac078